

Olwaandiko lwa kásatu lwa Yohana Obweébeembezi

Omu lwaandiko lwa kásatu, Yohana naamwaandikila omuuntu óogwo akaba naayétwa Gayo. Gayo akaba agimile bwooli habwo kumwiikiliza Kristu. Akaba naahwéela abeégesa abáandi áabo bakaba nibazoongoloka omu byaalo bya Asia habwe emilimo yo kusuugaanisa Empola Nzima za amazima. Yohana akamwaandikila habwo kumugumya omuganya, abone kuzeendelela kuhweela abeégesa abo.

Omu lwaandiko olu, Yohana naamugaamba omuuntu ogwo akaba naayétwa Diotireefe. Omuuntu óogwo akaba naaleengesa kwaángila abaantu be ekelezia bataákwaangisa abeégesa áabo bakaba niboolekeelela Empola Nzima za amazima. Káandi, Yohana naamugaamba omuuntu muluunzi óogwo alikutúula habwa amazima, omuuntu ogwo akaba naayétwa Demetiriusi.

Empola

¹ Íinye omunyaampala we ekelezia, niinkwaandikila íwe Gayo engaanzi yaanze. Mazima nkweénda.

² Óobu, engaanzi yaanze, niinsaba nka nikwo obonese omu bigaambo byóona no kuzila enzi-ingo zaawe nzima nko óokwo omwooyo gwaawe ku guteekaanisizwe.

³ Nkanulilwa bwooli, obuchilo abeekiliza badugu béetu bunaanka óobu bakéeza aha no kuunyatulila habwa amazima gaawe nka nikwo íwe noozeendelela buchiile omu kweékomya amazima.

⁴ Tihaliho chiintu echilikuúnuliza kusaaga okuhuliza nka nikwo abáana baanze nibazeendelela kutúula omu mazima.

Obweésigwa bwa Gayo

⁵ Owe engoonzi zaanze, íwe oli omweésigwa habwa ago gi olikubakolela abeekiliza badugu béetu, no óobu boónyini bali abazenyi hali íwe.

⁶ Bazeenzi béetu abo bakakwaátula ha baantu be ekelezia ya aha habwe engoonzi zaawe. Niinkusaba, ozeendelele kubahweela omu luzeendo lwa akazeendele áako akalikumunuliza Múungu.

⁷ Kuba bakabaanza oluzeendo lwaabo lwo kumuheéleza Yeézu Kristu batéena kwiinaankula choóna chóona echo kubazuna kuluga aha baantu abatakwiikiliza Múungu.

⁸ Mbwéenu, íchwé nitweendélwa tubahwéele abaantu nka abo. Habwo kukola tútyo, nitubona kukoba nábo omu milimo habwa amazima.

Diotireefe

⁹ Nkaandikila ebigaambo bíche ekelezia yáabo Diotireefe, náho weényini Diotireefe ogwo ayeénda kuba omwiibeembezi wáabo, naayaánga kwiikilizana no obuzizi bwéetu.

¹⁰ Ha bwéecho, obuchilo ndéeza okwo, ndaábita aha bwéelu ebikolwa ebyo, amagaambo mábi áago alikutugaamba ne ebisuba ébyo alikutubeéheleza íchwé habwa amagaambo go obuzilwa. Tibyo ebyo byoónka, káandi

naayaánga kwaángisa abeekiliza badugu béetu áabo bali omu luzeendo. Na abaantu áabo abalikweenda kubanyegeza, weényini naabaangila no kubabiinga baluge omu kelezia.

Demetiriusi

¹¹ Óobu Gayo, engaanzi yaanze, otaákutoolela entúungwa ezili mbi, náho ezo ezili nzima. Buli óogwo alikukola ebizima, ogwo no omuuntu wa Múungu. Náho óogwo alikukola amábi, ogwo takumusoombookelwa Múungu.

¹² Buli muuntu akaátula nka nikwo Demetiriusi no omuuntu omweésigwa, bityo na ago mazima goómwe nigeekilizana náze. Neechwe nitwaatula tútyo, neewe noomanya nka nikwo okwaátula kwéetu no kwa amazima.

Ebigaambo byo kulaga

¹³ Nnyina amagaambo méenzi go kukugaambila, náho tiínkweenda kugaándika áago góona kwe ekalamu no obwíino.

¹⁴ Niintegeza nka nikwo zuba zuba óobu niinyíza kukuyeélela no kuhooya neewe butúnu.

¹⁵ Obuhóolo bube hamo neewe. Banywáani baawe nibakwaángalucha. Neewe, obaanyaángalukize banywáani béetu abo okwo, buli oómo omu izíina.

Endagano Eénsha omu Chiziinza
Portions of the Holy Bible in the Zinza language of
Tanzania: Endagano Eénsha omu Chiziinza (New
Testament+)

copyright © 2024 Wycliffe Bible Translators, Inc.

Language: (Zinza)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 10 Jul 2025 from source files dated 10 Jul 2025

ec04e043-ebb2-5393-a814-029b879f102a